

Is Surat Ni Epustul Pablo Ziyà Te Ki Tito

Is Mehitenged te Surat he Para ki Tito

Is menge etew ziyà te Krita kenà memetau he ebmansu te keugelingen dan. Is menge etew he ed-ubpà dutun he pulu, utew menge teruen wey menge pegulen. Duen дума kandan he neketuu ki Jesu Kristu piru duwazuwa is kebpencilbi zan te Megbevayà. Ne wazà heeyan mekeeles ki Pablo umba midsugù din is egkeserigan he ebpekepengulu kandan he iyan si Tito su wey zin metevangi is menge tumutuu zutun su wey zan mekepenilbi te Megbevayà te paagi he ebpekenunuat te Megbevayà.

Is egkehuna he ebeelan ni Tito zutun, ne iyan is kebpili te menge etew he egkehimu he idsarig kandan is kebpengulu te zuma zan he menge tumutuu. Ne haazà sikandan kinahanglan he zait he edtehuzen wey kinahanglan daan he wazà egkesudii kandan.

Duen menge etew zutun te Krita he ebpemevayàbayà te mezaat he suat dan, kenè dan ebpemineg te tutuu he penurù su egkesuat sikandan he ebpekidibati. Ne midsugù ni Pablo si Tito he penurua zin haazà he menge etew he medtuu zan wey ipesungkad dan is kineiya zan te Lalag te Megbevayà. Kayi he surat, duen menge sugù diyà te menge tumutuu he impemesungkad: duen menge sugù he sungkad te megurang en he menge maama, sungkad te edliwezeenan en he menge vahi, sungkad te menguhed pa he menge maama wey menge vahi wey menge sugù he sungkad te uripen.

Kayi he surat ibpekegiyan ki Tito is menge etew ziyà te Krita te minsan pa te kenà iyan igkelibriya te etew te silut is ked-ulaulaha zin te meupiya su iyan dà is hizu te Megbevayà pinaagi te kebpelisa zin te menge salà te etew wey tenged te kebegayi zin te etew te begu he untung pinaagi te Wagas he Mulin-ulin. Piru kinahanglan gihapun he ibpehuna zan diyà te gehinawa zan is ked-ulaula te menge meupiya he menge vaal su wey zan mepenunuat is Megbevayà.

1¹⁻⁴Sikew, Tito, ebpesuratan ku sikew. Iring ka te tutuu he anak ku su is kedtuu nu te Nengazen, ne iring daan te kedì he kedtuu kandin. Berakat he ikegagew ka te Megbevayà wey te Menluluwas tew he si Jesu Kristu wey vegayi ke zan te melinawen he kebpekesavuk. Iyan a si Pablo is suluguen te Megbevayà wey is epustul, he ke và dà egkegiya, sugù ni Jesu Kristu. Iyan insugua zin kedì su wey ku meheget is kedtuu te menge etew he pinili te Megbevayà, ne wey ku zaan meheget is kedsavut dan te tutuu he tuluuwen he iyan edtuuwan ta. Elin daan insugua zin kedì is wey zan mesavut he ebpekeperateng dan te untung he wazà pidtemanann. Dengan te wazè pa limbaga is minsan hengkey, migkagi te Megbevayà he ibegey zin kenitew heini is untung ne netuenan ta he kenà egkehimu he kenè din edtumanen is egkegiyen din. Ne guntaan iyan en timpu te kebpetueni zin kayi te untung pinaagi te Meupiya he Tudtulanen. Ne heini he tudtulanen, insarig kediey te Megbevayà he menluluwas tew.

Is Baal ni Tito Ziyà te Krita

⁵Iyan integaka ku kenikew ziyàn te Krita is wey nu mehimasad is menge vaal he wazè ta mepasad, ne wey nu zaan mepilì diyà te kada inged is menge ebmegurangan he egkeserigan te menge tumutuu. Emun ebpiilen nu is menge ebmegurangan, ul-ulaha nu is intelaan ku kenikew. ⁶Is ebmegurangan, kinahanglan he wazà supak din, sevaha zà is esawa zin, ne kenè din selselai. Kinahanglan he menge tumutuu is menge anak din, ne kenà sikandan ed-isipen te menge etew he iyan dan dà ebpen-ahaan is kelibutanen he kelipey. Kinahanglan he metinumanen sikandan te menge idsugù kandan. ⁷Ne geina te insarig kandin te Megbevayà is kedumala te menge tumutuu, kinahanglan he wazà supak din. Kenà sikandin mebmandarmandar zà; kenà sikandin eengeren. Kinahanglan he kenà sikandin lelunguten, kenà sikandin ebpemegespeges ne kenà iyan dekelà diyà te gehinawa zin is selapì. ⁸Kinahanglan he meelima sikandin te menge megeliyug din ne kinahanglan daan he iyan utew zin egkesuati is kedtevangi zin te menge etew. Metau sikandin he ed-isip te hustu. Metazeng sikandin he etew wey igkesuat te Megbevayà is menge ulaula zin. Metau zaan sikandin he ed-egen te menge suat te lawa zin. ⁹Kinahanglan he zutun te kebpenurù din, kenè din suwayi is tutuu he tuluuwen he iyan impenurù ta. Su emun iyan ibpenurù din is tutuu he tuluuwen, egkeheget is kedtuu te ebpememineg kandin ne igkepesavut din he utew nengesayep is edsumpalit te penurù din. ¹⁰Umba egkegiyen ku heini su zuen mezakel he menge zuma niyu ziyàn he edsumpalit te hustu he penurù. Iyan is menge Hudiyu he tumutuu en ki Kristu. Wazà pulus te egkegiyen dan wey tarù is ibpenurù dan. ¹¹Kinahanglan he ibpeengkezan nu kandan is kebpenurù dan su ke zuen sevaha he egketazin is isip din pinaagi te kedtuuwi zin kayi he

penurù egkesemukan is kebpekid-upakat din te menge zuma zin dutun te pemilya zin. Iyan dà ibpenurua zan dutun te kenà hustu he ibpenurù is wey zan mekepenapì. ¹²Duen nevantug he menenagnà he zuma zan he tigKrita he migkagi te, “Teruen wey utew lalung is menge etew zini te Krita. Uteu zan egkeepesi is kedterebahu, iyan, utew zan egkesuati is kegkaan.” ¹³Ne utew venar is migkagi zin. Tenged dutun kinahanglan he pekezeseni nu sikandan te edawey wey mehustu is kedtuu zan ¹⁴ne wey zan meengkezi is kedtuu zan te menge tetezemen te menge Hudiyu wey te menge kelibutanen dà he sugù he mibeelan te menge etew he edsumpalit te tutuu he tuluuwen.

¹⁵Ke zuen etew he nelumpiyuwan te Megbevayà, wazà minsan hengkey he ibmeremerik din. Iyan, ke zuen etew he wazà melumpiyuwi te Megbevayà, wazà minsan hengkey pa he paagi he igkelumpiyu kandin su kenè sikandin edtuu ne nelalung utew is isip din wey gehinawa zin. ¹⁶Duen menge etew he egkegiyen dan he emigu sikandan te Megbevayà, iyan, pinaagi te menge ulaula zan egketuasan ta he kuntada sikandan te Megbevayà. Uteu zin sikandan egkeepesi su kenè dan ebpememineg te tutuu he tuluuwen. Ne tenged dutun kenè dan dait he ibpeulaula zin te minsan hengkey he meupiya.

Is Ulaula te Tumutuu

2 ¹Ne sikew mulà, kinahanglan he kenà ebpekesuwey is ibpenurù nu zuen te tutuu he tuluuwen. ²Is menge megurang en he maama, ne iyan ipenurù nu kandan is: kinahanglan he metau sikandan he ed-egen te menge suat te lawa zan; kinahanglan he zait sikandan he edtehuzen tenged te menge ulaula zan he meupiya; kinahanglan he metau zan he ed-isip te hustu. Meheget is kedtuu zan te Megbevayà, ebmahalen dan diyà te gehinawa zan is menge zuma zan, wey meinentusen sikandan. ³Ne iring ded daan dutun is penurù nu ziyà te menge megurang en he vahi. Kinahanglan he layun igkesuat te Megbevayà is menge ulaula zan. Kenà sikandan pereituk, kenà sikandan pereinum te vinu. Kinahanglan he layun dan ipenurù is meupiya he ulaula ⁴su wey zan ikepenurù diyà te menge menguhed he vahi is kebmahala zan te menge esawa zan wey menge anak dan, ⁵ne wey zan daan ikepenurù kandan is ked-isip te hustu, is kedlikayi te meremerik he ulaula, wey is kebpurungi zan te menge vaal zan. Kinahanglan he ebpeminegen dan is sugù te esawa zan. Ne emun iring dutun is menge ulaula te menge vahi wazà minsan hentei he ebpekekagi he mezaat is ibpenurù ta zutun te Lalag te Megbevayà.

⁶Ne iring din daan dutun is penurù nu ziyà te menge menguhed he maama. Kinahanglan he ipenurù nu kandan he purungi zan tengkai is menge ulaula zan. ⁷Sikew zaan, kinahanglan he layun meupiya is kenikew he ulaula su wey iyan ka meiringi te menge zuma nu. Ne emun

ebpenurù ka, kinahanglan he hustu is tuyù nu wey sungkad te Lalag te Megbevayà is paagi nu te kebpenurù. ⁸Is minsan hengkey he ibpenurù nu, ne kinahanglan he zutun ebpuun te hustu he tuluuwen su wey kenà egkekagi he sayep ne zutun wazà igkesudii kenita te minge kuntada ta, kekenà, egkeeled dan.

⁹Penurua nu is minge tumutuu he suluguen he peminega zan is sugù te minge egalen dan su wey ikesuat te minge egalen is minge vaal zan. Kinahanglan he kenè dan medsukul, ¹⁰ne kenè dan mebpenakew, kekenà, ipeehè dan he egkeserigan sikandan te egalen dan. Emun iyan haazà ulaula te minge suluguen he tumutuu egkesavut te minge etew he utew tutuu is tuluuwen he ibpenurù ta mehitenged te Megbevayà he iyan menluluwas tew.

¹¹Impegawagawa en guntaan is gagew te Megbevayà su wey mehimu he melibri te silut is tivuuk he menusiya. ¹²Ne pinaagi zutun te gagew egkesavut ta he kinahanglan he meengkezi ta is minge ulaula he kenà igkesuat te Megbevayà wey is kedtumana ta te minge suat te lawa ta zini te kelibutan. Kinahanglan he ed-egenen ta is minge kebaya ta he mezaat. Kinahanglan daan he metazeng wey igkesuat te Megbevayà is minge ulaula ta te zini ki pa ed-ubpa te kelibutan. ¹³Su zuen edtegaran ta he andew he zutun ibpegawagawa is lavew he Megbevayà he iyan Menluluwas tew he si Jesu Kristu he utew zekelà is gehem din. Iyan sikandin ebperetengen ta. ¹⁴Mibpehimatey sikandin he elili kenitew wey kiw zin melibri te kebpekeulaula tew te mezaat ne wey kiw zin daan mehimu he minge gaked din he etew he nelumpiyuwan he utew en egkengesuat he ed-ulaula te meupiya.

¹⁵Ne heini is langun he migkagi ku, ipenurù nu ziyà te minge etew ziyan. Gemita nu is kegehém nu te kebayaàbaya kandan. Sembagi nu wey dewaya nu sikandan. Kinahanglan he kenè ka lulupigan te minsan hentei.

Menge Sambag

3 ¹Kegiyi nu is minge tumutuu ziyan he kinahanglan he mebpsakup dan te velaud te gubirnu wey te minge upisyal ziyan. Medtuman dan te minge sugù dan kandan ne medtavang dan ke zuen meupiya he ed-ul-ulahan te gubirnu. ²Kegiyi nu kandan he kenè dan med-ituk te minsan hentei, kekenà, melinawen is kedepitè dan te langun, mebpکید-emigu zan te langun, wey kenè dan mepelevawen. ³Su sikita zaan is tumutuu, engey ki zengan wey mesinupaken ki te Megbevayà su wazè ta meturedu is tutuu he ibaya. Nengeuripen ki te minge mezaat he kebaya te lawa ta wey te minge kelipey he kenà meupiya. Netegeb dengan is isip ta te kelelalung wey kesina. Nepeukan ki te minge etew ne nepeukan ta zaan sikandan. ⁴Ne is Megbevayà he Menluluwas tew, hein neuma is timpu te kebpaahaa zin kenita te gagew zin wey ketulanged din,

⁵midlibri ki zin te silut. Iyan ingkelibriya zin kenita is: kenà tenged te menge metazeng he ulaula he nehimu ta, kekenà, tenged dà te hizu zin kenita. Midlibri ki zin pinaagi te kedlumpiyuwi kenita he iyan is kebpeuman ta kebpaanak pinaagi te gehem te Wagas he Mulin-ulin he nekevegey kenita te vegu he untung. ⁶Midhimu te Megbevayà he mepurung ki meulini te Wagas he Mulin-ulin pinaagi te kebpehimatey ni Jesu Kristu he Menluluwas tew. ⁷Umba mid-ulaula zin heini su wey tenged te gagew zin kenita meisip ki zin he metazeng ne maangken ta is untung he wazà pidtemanan he iyan ebperetengen ta. ⁸Uteu tutuu heini is impesavut ku kenikew.

Egkesuatan ku he ipurung nu ipenurù heini ziyàn su utew hustu wey zekelà is pulus kayi ziyà te minsan hentei. Ne emun nesavut en heini te menge tumutuu te Megbevayà iyan dekelà diyà te gehinawa zan is ked-ul-ulaha zan te meupiya. ⁹Iyan, likayi nu is winalì he kebpekidlewanà te menge etew. Likayi nu zaan is ked-istudyu te menge gugud te menge ngazan te menge kepuun te etew he iyan baal zan. Ne elin nu zaan likayi is kebpekid-eged dan mehitenged te kedtumana te kesuguan he imbilinbilin ni Moises. Wazà pulus te langun kayi su ebpekezezaat. ¹⁰Ke zuen duma niw he edsemuken din is upakat te menge tumutuu, dewaya nu, ne emun kenà ebpevineg, umani nu zewaya. Ne emun kenè pa zutun ebpevineg engkezi nu sikandin. ¹¹Su egketuenan nu zutun he is etew he iring kayi, nekesuwey is isip din te hustu he ulaula. Minsan pa te netuenan din he mezaat is ulaula zin, ebpeniguduwan din gihapun.

¹²Emun ebpeveyaan ku sikew ki Ertimas ne emun kenà, si Tikiku, gaangaan ka telavuk kediey ziyà te Nikupulis su ziyà a ed-ubpà ke egkeuma is tipenguzan. ¹³Himuwa nu is taman te egkehimu nu wey nu metevangi is ebugadu he si Sinas wey si Epulus ke edhipanew zan. Susiya nu sikandan su wey wazà kurang dan. ¹⁴Ipenurù nu ziyà te menge zuma nu he tumutuu ziyàn he kinahanglan he iyan dekelà diyà te gehinawa zan is ked-ulaula zan te meupiya wey zan metevangi is menge edlised. Kenà meupiya ke zuen tumutuu he pegulen su wazà pulus dutun.

¹⁵Ebpepengemusta kenikew is langun he menge zuma ku kayi. Ipengemusta key zaan te langun he menge emigu zey he tumutuu ziyàn. Berakat he ikegagew kew te Megbevayà is langun.